

Direktor Nezavisne sudske komisije preporučila produžetak procesa sveobuhvatne provjere

Direktor Nezavisne sudske komisije, sudija Rakel Surlien, juče je obavijestila Federalnu komisiju za sudije, Federalnu komisiju za tužitelje, Visoki sudijski savjet RS kao i Visoki tužiteljski savjet RS da Nezavisna sudska komisija preporučuje skupštinama Federacije i RS da produže period trajanja procesa sveobuhvatne provjere za još godinu dana.

Proces sveobuhvatne provjere koji u Federaciji ističe sredinom decembra, a u RS u januaru/februaru 2002.god., pokrenut je kako bi se ustanovili i ispravili nedostaci u radu sudija i tužitelja.

U pismu koje je uputila sudijskim i tužiteljskim organima Federacije i RS, sudija Surlien je konstatirala da iako je potrebno da se period trajanja postojećeg procesa provjere produži, sam proces se mora značajno unaprijediti ukoliko se tim procesom želi postići bitno poboljšanje u sprovođenju pravde u BiH. Sudija Surlien je istakla da se nedovoljna sredstva za finansiranje sudskog sistema te suviše komplikovane zakonske procedure mogu djelimično smatrati razlogom za široko rasprostranjene probleme, iako je dodala da se također moraju riješiti pitanja vezana za radnu sposobnost, slabu administrativnu upravu i lošu radnu etiku.

Zbog činjenice da onima koji su zaduženi za provjeru rada

sudija i tužitelja u skladu sa procesom sveobuhvatne provjere ovaj posao ne predstavlja jedini angažman, učinkovitost programa je ograničena. Nezavisna sudska komisija je osigurala sredstva da u svakom od ova četiri tijela, koja vrše provjeru, angažira po tri pravna stručnjaka na puno radno vrijeme, što će, kako se očekuje, doprinijeti većoj efikasnosti.

Proces sveobuhvatne provjere se kritikuje i zbog toga što se uglavnom rukovodi podnesenim žalbama. Idealno bi bilo da komisije/savjeti vrše sistematsku provjeru rada svakog sudije i tužitelja. Pored toga, činjenica da su oni koji su odgovorni za poduzimanje disciplinskih mjera kolege sudija i tužitelja protiv kojih se poduzimaju te mjere, dovela je do toga da je nesrazmjerno mali broj žalbi rezultirao sankcijama.

Sudija Surlien je u svom pismu apelirala na sudijske i tužiteljske organe Federacije i RS da do 1. avgusta 2002.god izvrše temeljitu provjeru rada svih tužitelja i sudija – bez obzira na žalbe.

Budući da su do sada poduzete mjere dale nezadovoljavajuće rezultate, međunarodna zajednica će razmotriti drastičnije mjere kako bi osigurala najviši standard rada i ponašanja sudija i tužitelja u BiH. Učinkovit i pravičan pravosudni sistem predstavlja ključni stup jedne održive, demokratske zemlje.